



# Synfocity = 633

mail us at : [mzsynfo@gmail.com](mailto:mzsynfo@gmail.com); [mizoramsynod@gmail.com](mailto:mizoramsynod@gmail.com) - Phone - 2314648

4<sup>th</sup> May, 2017

- ❑ **Synod Pastoral Committee a thu**  
 May 2, 2017 (Thawhlejni) khan Synod Office-a J.M. Lloyd Hall-ah Synod Pastoral Committee a thu a, hei hi kum 2016 - 2018 term thutkhawm wawi 4-na a ni a. Meeting-ah hian member 106 an kal thei a ni. Meeting hi Synod Moderator Rev. Lalzuithanga'n a kaihruai a, thu pawimawh ngaihtuah tur (agenda) 4 chhawpchuah a ni. Rev. Lianhmingthanga Sailo, Synod Secretary-in reports pein Secretary reports ngaihthlak a ni a, Kum 2016 Synod Inkhawmpuiin a rel angin Synod Mission Field chungah January 15, 2017 khan Bial thar 4 luang taka hawn a nih thu te, Synod Inkhawmpui 2016-in Pastor leh Pro. Pastor awmna a sawnte leh an awmna tur a ruat thar Pastor 71 leh Pro. Pastor 23 (an vaiin 94) te chu ruahman lawk angin January 15, 2017 khan luang takin Induction neihpui thu te, Mizoram Synod hnuaiia Pro. Pastor lak tharte chuan February 13 - 17, 2017 chung khan Synod Multipurpose Training Centre (SMTC) ah Orientation training neih thu te, Rev. A.K. Dawia, Tripura-a Bru ral tlan zinga rawih mek chu March - December, 2017 atan rawih chhonzawm leh a ni a, Rev. Thangzauva, Cancer Hospital, Zemabawk-a Chaplain atana rawih mek chu January - December, 2017 atan rawih chhonzawm a nih thu leh Pastor Quarters sak thar tur 7 leh sak that tur 2 Synod OM in a thlan thu tarlan a ni bawk. Synod Pastoral Committee hian Synod hnuaiia Pastor hna thawk lai mek zirna sang zawk zir chhonzawm dilte chungchang a ngaihthuah a. Diltu hi Pastoral hnuaiia mi 4, Ramthar Board hnuaiia mi 6 leh Theological Education Board-in Faculty Development atan a dilpui mi 6, an vaiin 16 an ni.
- ❑ **Synod Office Annexe Building thar hlan leh hawna**  
 May 2, 2017 (Thawhlejni) khan Synod Office Annexe Building thar chu Synod Moderator Rev. Lalzuithanga'n Pathian hnenah hlanin a hawng. Building thar hlanna leh hawna hun hi Rev. Lalramliana Pachuau, Senior Executive Secretary in a kaihruai a, T. Upa Thangliankhuma, Assistant Engineer, Synod Office-in Technical Report a pe. Synod Moderator Rev. Lalzuithanga'n Ribbon chepchatin Building thar hlanna leh hawna hun a hmang nghal a, Rev. P.C. Pachhunga, Executive Secretary-in lawmthu sawina hun hmangin Rev. Lianhmingthanga Sailo, Synod Secretary-in Malsawmnain programme a khar a ni. Kum 2011 Synod Inkhawmpui Gen. 66-in a remtih angin Synod Office Annexe Building hi Synod Office bul hmar lam Annexe Building leh Music Class Room Building hmun hluiah sak a ni a. Mizopa chhiara chhawng li-a sak a ni a. Basement-I hi Synod Worship Department leh Music Class Room hrang hrang awmna tura ruahman a ni. Basement-II hi Synod Information & Publicity Department (Synfo) leh Studio awmna tur atan ruahman a ni a, Basement-III ah hian Chowkidar Quarters leh Synod Trust Store Room awm tura ruahman a ni. Plan & Estimate hi TBL Architect Consultant, Khatla te siam a ni a, Architect hi Upa Samuel Lalfana a ni a, Structural Engineer hi Er. Hrangthanga Zote a ni. Annexe Building sak hi Synod Trust Committee-in a enkawl a, Upa R. Sangkhuma, Khatla chuan a sak hna hi a thawk a ni. September 2, 2013-ah hna tan a ni a, March 28, 2017 (kum 3½) ah sak zawh a ni. A sak nan hian Rs. 485,45,000/- ruahman a ni a, ruahmanna ang takin sak zawh theih a ni. Total Floor Area hi 15191sq.ft. a ni a, a chung lam zawm belh zel theih tura ruahman a ni.
- ❑ **Synod Social Front Committee Wawi 183-na a thu**  
 May 3, 2017 (Nilaini) chawhma dar 10:00 khan Synod Office-a J.M. Lloyd Hall-ah Synod Social Front Committee wawi 183-na a thu a, member 39 an kal a ni. Secretary Report atanga a lan danin February 1, 2017 atangin Synod Charity Store chu Tuikhuahtlang atangin Zosaphluia Building, First Floor-ah insawn thlak a nih thu te, Synod Social Front-a Asst. Coordinator Upa Bonny Lalrindika'n thisen cancer avangin February 19, 2019 khan chatuan ram a pan san thu te, Synod Social Front-in HIV/AIDS dona kawnga hma a lakna kawngah Project FHI 360 nen chak zawka hma lak ho zel dan ngaihtuah te, Zuk leh hmuam-a kan fihlim theih nana hmalakna kal zelah kohhrante hnenah Booklet thawn a nih thu leh hemi hmang hian hma la tura ngen nghal a nih thu te, Tuihna humhalh chungchanga hmalakna atan 'Tuihna humhalh' bu chhuah pawh Kohhrante hnenah thawn a ni a, booklet hmangin a theih anga hma la tura ngen nghal a nih thu te, Tuihna humhalh chungchang Talk Show neih a nih thu te, March 2, 2017 khan Vanapa Hall-ah Political Education Campaign Kick-off buatsaih a nih thu te, Kum Upate inkawmhlina hmuna hma lakna pawh luang taka a kal zel thu te, Zu-in Mizote min nghawng dan zirchianna (research) neih a nih thu te, tun hnaiah Political Education Seminar wawi 3 leh Zuk leh hmuam & Tui hna humhalh Seminar wawi 1 siam a nih thu te, Rescue Home-a thawktu thenkhat te'n Synod Hospital-ah Refresher Course an neih thu te leh November 2016 - April 2017 chung khan Synod Rescue Home-ah dam lo mipa 94 leh hmeichhia 31, an vaiin 124 admit an nih thu te ngaihthlak a ni. He Committee hian Political Education Campaign neih dan tur te, Zu-in Mizote min nghawng dan zirchian thu te, Tuihna humhalh leh Zuk leh hmuam do chungchanga hmalak zel dan tur te an ngaihtuah a ni.
- ❑ **PRESCOM Board Meeting Wawi 163-na**  
 Wawiin (May 4, 2017) chawhma dar 10:00 khan Synod Office-a J.M. Lloyd Hall-ah Synod PRESCOM Board meeting wawi 163-na a thu a, meeting hi Rev. Lalzuithanga, Synod Moderator-in a kaihruai a ni. He meeting hian Presbyterian English School hman tur Hlabu siam thu te, Bookroom Distributors Manual siam thu te, Kawrthah khuaa Synod Bookroom din chungchang te, Kanhmun khuaa Synod Bookroom Branch hawn thu te, Aizawl West huam chungah Bookroom Branch hawn rawtna te, In sakna leh khawl leina atana sum hmuhna zawn thu te an rel a, Statement of Account an thlirho bawk. Secretary report ngaihthlak a ni a, Bookroom Bazar Branch, Aizawl hmun LSC chu Land Lease-a let tura hmalak mek a nih thu te, PRESCOM Assistant II atangin PRESCOM Assistant I thawktu 2 leh PRESCOM Assistant III atangin PRESCOM Assistant II-ah thawktu 6 an kaisan thu te, Paper lama an harsatna a la ngai reng thu te, Web Offset khawl thar leh khawla lehkhapuan hlum hlan kaina khawl lei a nih thu te, Bookroom lamin Kohhran mipui tana remchang Special Sale, Mobile Bookshop leh Literature Campaign hmun hrang hrangah a neih thin thu te tarlan a ni. Kum 2016-2017 Financial Year chung khan Synod Press hian an Budget Rs. 5,30,40,000/- atangin Rs. 5,95,80,673/- lai an thawk chhuak a, budget khumna hi Rs. 65,40,673/- a ni. Bookroom lam hian an Budget Rs. 8,80,00,000/- atangin Rs. 13,51,01,541/- an thawk chhuak a, budget khumna hi Rs. 4,71,01,541/- a ni.
- ❑ **Trust**  
 May 4 & 5, 2017 chung hian Tawipui North Pastor Quarters sak enpuiin Pu Lalramenga Royte, JE leh Pu K. Lalremruata, O/A te an kal.
- ❑ **Zin**  
 May 6, 2017 (Inrinni) hian Chhiahtlang Kawnveng Pastor Quarters hmun enfelin Rev. Lalramliana Pachuau, Senior Executive Secretary a kal ang.

Contd..

- ❑ **Worship Dept**  
 May 2 - 5, 2017 chung hian Hnahlan Bial KTP Conductor's Training neih a ni a, hemi hunah hian Pu Lalrinmawia, instructor leh Tv. Hmingthanmawia te an kal.
- ❑ **Obituary : Rev. Tlanglawma, Kum 80**  
 Rev. Tlanglawma (kum 80), Ramthar Veng chu April 29, 2017(Inrinni) chawhnu dar 12:55 khan Thisen Cancer avangin a thi a, A tuk ni 30 (Pathianni) khan vuiliam a ni. Rev. Tlanglawma hi kum 1937 October 11-ah Parvatui khuuah a piang a. A pa chu Vansuaka a ni a, a nu chu Rothuami a ni. Kum 1959 September thlaah harh tharna a chang a, Kum 1960-a Pathian thu mahni intum chawpin a zir a, a hun awlah a inhlawh zak zak thin a ni. Rev. J.M. Lloyd, Principal, Aizawl Theological College-in Theological Board-a a dilpui angin Pathian thu a zir kum hnihna atangin Synod chwamin a zir ve ta a ni. Kum 1962-ah Pro. Pastor atan lak a ni a, Kolasib Bial, Bilkhawthlirah dah a ni. Kum 1966 Synod-ah nemngheh niin Bial hrang hrang - Kawlkulh, Saitual, Thenzawl, Chaltlang te a vawng a ni. January 1998 ah a pension a, Ramthar Veng, Aizawlah a inbengbel ta a ni. Arawngbawl chungin nupa tuak 519 a inneih tir a, mi 5419 baptisma a chantir bawk. Kum 1990 velah blood sugar hniam avangin a insawisel ve deuh a, Kum 2008-ah lung lam that lohna avangin Birla Hospital, Kolkata-ah angioplasty tih a ni a, heta tang hi chuan lung lam harsatna a nei ta lo. April 6, 2017-ah blood sugar hniam avang bawkin Synod Hospital ICU-ah dah luh a ni a, Investigation-a theih anga ranga tih a niin, Acute Leukemia (thisen cancer) a ni tih hriat chhuah a ni a. April 24, 2017-ah ICU atangin cabin-ah sawn chhuah a ni a; that chhuah tak tak nei lovin April 29, 2017 dar 12:45 pm-ah Lalpa hnênah a chwâl ta a ni. A tuk ni 30 (Pathianni) chawhnu dar 1:30 khan Ramthar Veng Kohhran Biak Inah Rev. H. Lalrinmawia, Ex-Moderator in a vui a, Rev. Lianhmingthanga, Synod Secretary-in a chanchin a sawi a, Ramthar Veng Pastor Bial Zaipawl leh Kohhran Zaipawl te an zai a, Upa Dr. H. Vanlalhluna, Synod Statistician-in tawngtaisakna hun hmangin Rev. B. Sangthanga, Executive Secretary in malsawmna a sawi a ni. (For more Information, Please visit : [www.mizoramsynod.org](http://www.mizoramsynod.org))
- ❑ **NEICCWA 12th Biennial Assembly tuang taka neih a ni**  
 April 28 - 30, 2017 chung khan North East India Christian Council Women Assembly chuan 12th Biennial Assembly, KJP Synod Sepngi ten Presbyterian Church, Mairangah an thlang a, thupui chu "Revive us again" a ni. April 29, 2017-ah Rorel inkhawm neih a ni a, Rorel palai 464 an ni. Rorel inkhawm zawhah Exhibition & Sale hun hman a ni a. Zan lamah Cultural Nite hman a ni bawk. Pathianni zingkarah Lalpa Zanriah Sakramen kilho a ni a, chhun lam leh zan lamah Pathian Biak Inkhawm neih a ni bawk a. NEICCWA hi India Hmarchhaka Kohhran hrang hrang te inzawmkhawm pawl a ni a, he pawl a annual contribution pe te hi pawl 33 zet an ni. 13th. Biennial Assembly chu KJP Synod Mihngi -in Presbyterian Church, Malki, Shillong-ah an thlang ang.
- ❑ **Presbyterian English School HSLC Result**  
 May 2, 2017 (Thawhlejni) a HSLC Result chhuakah Presbyterian English School ten an ti tha hlawm hle a, School 19 in HSLC Exam an bei a, chung zinga School 10 - Serchhip, Saiha, Darlawn, Zotlang (Champhai), Khawzawl Venglai, Lengpui, East Lungdar, Thingsulthliah, Khawlailung leh Khawruhlian ten 100% an passed a ni. Exam beitu zawng zawng hi 360 an ni a, passed zawng zawng hi 332 an ni. Distinction 40, 1st Div. 139, 2nd Div. 123, 3rd Div. 30 niin a pum pui Passed Percentage hi 92.22 a ni.
- ❑ **MSSU**  
 ♦ May 5 - 7, 2017 chung hian Shillong Bial Sunday School Zirtirtu Training neih a ni dawn a, hemi hunah hian Upa Lalthahluna Rate, MSSU Asst. Coordinator leh Upa K. Zoremsanga, MSSU Trainer, Kulikawn te an kal ang. Pathianni Chawhnu Inkhawmah Upa K. Zoremsanga, Kulikawn in thuchah a sawi ang.  
 ♦ May 6, 2017 (Inrinni) hian Tuikhuatlang Kohhran Sunday School Zirtirtu Training neih a ni dawn a, hemi hunah hian Pu John Lalhruiatluanga, MSSU Asst. Coordinator, Upa K. Vanlalghaka, MSSU Trainer, Ramhlun East leh Upa B. Lalhmunliana, MSSU Trainer, Bethlehem Venglai te an kal ang. Zan Inkhawmah Pu John Lalhruiatluangan Fanau enkawl chungchang thuchah a sawi ang.
- ❑ **Mission Board**  
 May 4 - 7, 2017 chung hian Missionary Retreat for Central Region, vawi 3-na Vaivakawn Kohhran Biak Inah neih tur a ni a. Thupui - "Li thuk lama len den" (Luka 5 : 4) niin Speaker chu Rev. Lalfakawma Ralte, Lecturer, ATC a ni. Retreat tan zan hi inlawmna leh Report inkhawm a ni ang a, Zirtawpni zan atangin Speaker hnen atangin thuchah ngaihthlak a ni ang. Pathianni chawhnuah Missionary thi te sunna hun hman a ni ang a, zana Rev. B. Sangthanga, Executive Secretary hnen atangin Pathian thuchah ngaihthlak a ni ang.
- ❑ **KTP**  
 May 6, 2017 (Inrinni) hian Reiek Bial KTP Leadership Training neih a ni dawn a, hemi hunah hian Upa Rosangliana leh Pu F. Lalremruata, Comt. Member te an kal ang.
- ❑ **Synod-in chhawmdawlina pe**  
 Tun hnaia harsatna hrang hrang neite hnenah Synod Relief Fund atangin chhawmdawlina hetiang hian pek an ni.

S.No	Khua	Pek chhan	Chhungkaw zat	Chhawmdawlina pek zat
1.	New Serchhip	In kang ral vek	2	Rs. 12,000/-
2.	Hunthar	In chhe vek	2	Rs. 20,000/-
3.	Serkhan	Damlo rethei	1	Rs. 6,000/-
<b>TOTAL</b>				<b>Rs. 38,000/-</b>
- ❑ **Susamachar Prasaran Programme**  
 ♦ **MAY 7, 2017 (Pathianni) 5:00 pm. : Group/Choir/Solo : Karbi Presbytery Choir - Nang ingthir et, Group/Choir/Solo : Tanhrih Bial Masihi Sangati - Mera Sahara, Sermon : Lalramzauva, Group/Choir/Solo : Champhai Vengthlang Pastor Bial - Hamara Kal, Group/Choir/Solo : Kristian Centre Zaipawl - Hawale**
- ❑ **MAY 7, 2017 (Tv Programme) @ 3:00 p.m) :**  
**Weekly Round Up, Sawihona : Kohhran Kalphung, PBS 39th Batch Farewell & Dedication Service 2017**
- ❑ **Moderator Programme**  
 May 6, 2017 Inrinni Tawizo Kohhran Biak In hawn Mualpheng Bial  
 May 7, 2017 Pathianni Chawhma Lenchim Kohhran Bilkhawthlir Bial  
 May 7, 2017 Pathianni Chawhnu Mualpheng Kohhran Bilkhawthlir Bial  
 May 7, 2017 Pathianni Zan Mualpheng Kohhran Bilkhawthlir Bial